

太清金闕玉華仙書八極神章三皇內秘文

序

九玄之初二象未構空洞凝華靈風集粹神章結於混成玉宇標於獨化提乎有無之際煥乎玄黃之先日月得之以照臨乾坤資之以覆載於是無上虛皇命元始大聖編于金闕次於玉章內松上玄未流下土降鑒有道乃賜斯文故軒轅受符伏羲受圖高辛得天經大禹獲洛書神道有攝降啓於茲矣又玄元愍俗歷為帝師人倫浮偽則垂道德以示淳朴鬼神雜擾則降此文以蕩妖邪斯又西臺而隱靈文東華而秘真訣其龍章雲篆非賢不傳戒之不退用之保專雖未得神仙之道而亦在世遊行已證地仙之果也可以玉石作匣五鍊為囊秘藏丹房而勿慢輕矣

太清金闕玉華仙書八極神章三皇內秘文

卷上

微正章第一

天皇君曰太虛之先寂寥無象何以至精感激而真一存焉真一運行而元氣自化元氣有中之無無中之有廣不可量微不可察氤氳漸著混元無移萬象之端兆朕於此以清微明朗者浮之為天濁滯頓昧者積之為地平和柔順者結之為人至靈剛秀者化之為神錯謬陰戾者散而為異類皆稟一氣之所生分萬殊而各位雖群動糾紛而皆可聖矣滅而復生周而復始道德之體人神之心感應不窮未嘗倍於動用之境矣故道者乃虛無之象造化之根神明之本天地之源其大無外其微無內浩曠無端杳冥無際而至幽靡測而大明垂光至靜無心而品物有方混元無物寂悄無聲萬象以之而生五行以之而成生者有極成者有虧生生成成今古湛然不移此之為道也德者天地所稟陰陽所資經以五行緯以四時牧之以君訓之以師

幽冥動植咸暢其宜恩流不息群生不知此之為德也是知道德者乃天地之祖也天地者乃萬物之父母也羅天之尊者乃虛無之紀綱也八極之神者乃天地之柄也日月清明者乃天地之度數也萬星群象者乃天地之變道也五行六氣者乃天地之樞機也帝王國君者乃三才之主總也群品之類者乃陰陽之移氣也精邪鬼怪者乃天地之影響也靈芝仙藥者乃精明純粹所化也是知萬物之源者皆道德為根象帝之先真一之為本也

神宗章第二

天皇君曰天地者不能自有生也生天地者太極也太極者不能自運也運太極者真精也真精者自然運化也惟神惟明是曰虛皇高居九清乃司玄化總御萬靈者曰元始君也元始君者一曰盤古真人二曰九皇都主三曰八極神王四曰大羅仙總持天形如目蓋日月未著明星辰未著光玄元虛曠汎蕩彌冥寂寂混沌無名上無所係下無所